

आकाशवाणी जयपुर-अजमेर
प्रादेशिक समाचार

- प्रधानमंत्री नरेन्द्र मोदी जयपुर कने भाजपा री परिवर्तन संकल्प महासभा ने सम्बोधित कीनी-कह्यो के केन्द्र दशकां ऊं लम्बित महिला आरक्षण बिल पास करायो।
- प्रधानमंत्री काल राख्या जावण वाळा रोजगार मेळा मांय 51 हजार जणां ने नियुक्ति पत्र देवेला-जयपुर, बीकानेर अर अजमेर मांय ई रोजगार मेळा लगाया जावेला।
- मुख्यमंत्री अशोक गहलोट अदालतां मांय लम्बित मामलां रा निपटारा मांय सूचना प्रौद्योगिकी रो इस्तेमाल बधावण बाबत कह्यो।

अर

- दक्षिण पश्चिम मॉनसून री प्रदेश ऊं विदाई सरू व्ही।

000

प्रधानमंत्री नरेन्द्र मोदी कह्यो है के आज देश रो गौरव आसमान माथे है अर दुनिया मांय भारत री वाहवाही व्हे रही है। वे आज जयपुर कने दादिया गांव मांय भारतीय जनता पार्टी री ओर ऊं राख्यी ज्यी परिवर्तन संकल्प महासभा मांय बोल रह्या हा। मोदी कह्यो के म्हाणो चंद्रयान वां ठौड़ पूग्यो, जठे कोई देश नी पूग सक्यो। वे कह्यो के भारत कानी ऊं जी-20 री कामयाब सदरत ऊं विरोधी देश ई हैरान अर परेशान है। प्रधानमंत्री कह्यो के गणेश चौथ रे मौके नुवा संसद भवन मांय कामकाज सरू करी ज्यो। वे कह्यो के नुवी इमारत मांय सब ऊं पहलो काम माता-बहनां ने समर्पित रह्यो अर दशकां ऊं लंबित 33 फीसदी महिला आरक्षण बिल संसद ऊं पास करावण रो काम पूरो व्हे ग्यो। लोकसभा अर विधानसभावां मांय महिला आरक्षण रा मुद्दा माथे वे कह्यो के कांग्रेस समेत विपक्ष री दूजी पार्टियां ने ई मौका मिल्या हा, पण वे महिला आरक्षण रा मुद्दा ने अटकाता रह्या। वे कह्यो के जनता रा दबाव मांय विपक्ष री पार्टियां महिला आरक्षण रा मुद्दा माथे सरकार री हिमायत कीनी है।

000

प्रधानमंत्री कह्यो के भाजपा रो मतलब जो वायदा करी ज्यो, वां रे पूरा व्हेवण री गारंटी है। प्रधानमंत्री कह्यो के वे पूरी मेहनत ऊं देश री जनता री सेवा मांय लाग्योडा है। 'वन रैंक वन पेंशन' अर भ्रष्टाचार रे खिलाफ करी ज्यो जतन रो जिकर करता थकां वे कह्यो के जद नीयत साफ व्हे है तो गारंटी पूरी करणो पहचान बण जावे है। लारला नौ साल मांय लागू करी ज्यो न्यारी न्यारी योजनावां रो जिकर करता थकां प्रधानमंत्री कहो के वां रा राज मांय आमजन री परेशानियां दूर करण रो काम करी ज्यो। वे कह्यो के केंद्र सरकार भणार्ई-लिखाई, स्वास्थ्य अर औद्योगिक विकास समेत हर हलका माथे ध्यान दीनो है। प्रधानमंत्री राज्य मांय कांग्रेस रा राज मांय व्हे रह्या कामकाज माथे सवाल उठाता थकां कह्यो के ज्यीं भांत लारला करीब पांच साल मांय राज चलायी ज्यो, प्रदेश री कांग्रेस सरकार जीरो नंबर री हकदार है। वे कह्यो के भाजपा री परिवर्तन संकल्प यात्रावां ने जनता री जो हिमायत मिली है, वा ई बात रो इशारो है के राजस्थान रो मौसम बदल ग्यो है। प्रधानमंत्री राज्य मांय पेपरलीक अर कानून व्यवस्था रो जिकर करता थकां कह्यो के प्रदेश री कांग्रेस सरकार रे खिलाफ रीस बध रही है। वे कह्यो के प्रदेश मांय आवता चुनाव मांय भाजपा री सरकार बणबा री सूरत मांय पेपरलीक माफिया रे खिलाफ करडी कार्रवाही करी जावेला। वे कह्यो के नौजवानां रा भविष्य सागे खिलवाड़ करण वाळा किंण ई माफिया ने नी बख्शो जावेला।

000

इण ऊं पैली प्रधानमंत्री जयपुर कने धानक्या गांव मांय पं. दीनदयाल उपाध्याय रा स्मारक स्थल माथे पूग र वां ने सिरधाभाव सागे याद कीना। वे पण्डित दीनदयाल उपाध्याय री जिन्दगी माथे आधारित म्यूजियम ई देख्यो।

000

प्रधानमंत्री नरेंद्र मोदी काल लगाया जावण वाळा रोजगार मेळा मांय संवारे साढे दस बज्यां वीडियो कॉन्फ्रेंसिंग रे मार्फत नुवा नौकरी लाग्या कोई 51 हजार जणां ने नियुक्ति पत्र देवेला। ई मौके प्रधानमंत्री आं लोगां ने संबोधित ई करेला। रोजगार मेळा देश री 46 ठौडां लगाया जावेला। प्रदेश मांय जयपुर, अजमेर अर बीकानेर मांय ई काल रोजगार मेळा लगाया जावेला। जयपुर मांय जल शक्ति मंत्री गजेंद्र सिंह शेखावत, अजमेर मांय केंद्रीय कृषि अर किसान कल्याण राज्यमंत्री कैलाश चौधरी अर बीकानेर मांय विधि अर न्याय अर संसदीय कार्य मंत्री अर्जुन राम मेघवाल खास पावणा रा तौर ऊं शिरकत करेला।

000

प्रधानमंत्री नरेन्द्र मोदी जनता ऊं 1 अक्टूबर ने संवारे 10 बज्यां 1 घंटा सारू सफाई बाबत सामूहिक रूप ऊं श्रमदान करण री अपील कीनी है। वे मन की बात रा 105 वां एपिसोड मांय सगळा नागरिकां ऊं कह्यो हो के ओ गांधी जयंती री पैली वाळी सिंज्यां बापू ने सच्ची स्वच्छांजलि व्हेला।

000

मुख्यमंत्री अशोक गहलोत अदालतां मांय चाल रह्या मामलां रा निपटारा मांय सूचना प्रौद्योगिकी रो इस्तेमाल बधावण बाबत कह्यो है। वे आज जोधपुर मांय राजस्थान हाई कोर्ट मांय महाधिवक्ता कार्यालय रा नुवा भवन रा उद्घाटन पाछे राख्यी ज्या जळसा मांय बोल रह्या हा। मुख्यमंत्री कह्यो के लम्बा चाल रह्या मामलां रा कारणां माथे ही गंभीर सोच-विचार कर्यो जावणो चाहिजे। वे कह्यो के राज्य सरकार न्याय हलका ने और मजबूत बणावण सारू साधन-सुबीतां मांय बधोतरी री कोशिश कर रही है। गहलोत कह्यो के सरकार 200 ऊं बत्ती नुवी अदालतां खोली जा रही है अर दर्जो बधायो जा रह्यो है। मुख्यमंत्री कह्यो के लिटिगेशन पॉलिसी लागू करण री कोशिश करी जावेला। वे हाईकोर्ट मांय हर महीना री आखिरी तारीख ने करी जावण वाळी हडताल खत्म करण री अरज कीनी। मुख्यमंत्री कह्यो के देश मांय सब ऊं पैली राजस्थान मांय एडवोकेट प्रोटेक्शन बिल, गिग वर्कर्स एक्ट, स्वास्थ्य का अधिकार अर राजस्थान न्यूनतम आय गारंटी सरीखा केई ऐतिहासिक अर खास कानून लागू करी ज्या। जळसा मांय राजस्थान हाईकोर्ट रा मुख्य न्यायाधीश न्यायमूर्ति ऑगस्टीन जॉर्ज मसीह कह्यो के आखिरी पांत तांई री जनता ने बेगो अर सस्तो न्याय मुहैया करावण सारू सगळां ने कोशिश करणी व्हेला।

000

उपराष्ट्रपति जगदीप धनखड़ 27 सितंबर, 2023 ने प्रदेश रा एक दिन रा दौरा सारू पधारेला। वे झुंझुनू, बाड़मेर, बीकानेर अर जोधपुर मांय राख्या जावण वाळा न्यारा-न्यारा कार्यक्रम मांय सिरकत करेला। वे पिलानी रा बिट्स मांय शिक्षकां अर विद्यार्थियां सागे बातचीत करेला। ई पाछे उपराष्ट्रपति बीकानेर मांय प्लाट रा मूंगफली अनुसंधान संस्थान रो उद्घाटन कर र कृषि वैज्ञानिकां सागे बातचीत करेला। उपराष्ट्रपति रो बाड़मेर जिला रा गुढामालानी मांय प्लाट रा बाजरा अनुसंधान संस्थान री नींव रखण अर कृषि वैज्ञानिकां अर जनता सागे बातचीत करण रो कार्यक्रम है। उपराष्ट्रपति रो खेतारामजी की पोल रा ब्रह्मा जी मंदिर मांय दर्शन अर पूजा-अर्चना रो ई कार्यक्रम है। उपराष्ट्रपति रो जोधपुर मांय नेशनल लॉ यूनिवर्सिटी रा शिक्षकां अर विद्यार्थियां ने संबोधित करण रो ई कार्यक्रम है।

000

दक्षिण पश्चिम मॉनसून री प्रदेश ऊं विदाई सारू व्हे ग्यी है। मौसम विभाग ऊं मिली जाणकारी रे मुजब राज्य रा कुछ दक्षिण-पश्चिमी हिस्सां ऊं मॉनसून परो ग्यो है। ई बीचे प्रदेश मांय केई ठौडां बिरखा व्ही। उदयपुर अर हनुमानगढ रा फेफाना मांय 7 सेंटीमीटर, बडी सादडी अर पल्लू मांय 6-6, बहरोड़ अर जियोला मांय 5-5 सेंटीमीटर पाणी बरस्यो। सिरोही, झुंझुनू, राजसमंद, अलवर, प्रतापगढ, चित्तौडगढ, सीकर, झालावाड़, भीलवाडा, भरतपुर, बीकानेर, श्रीगंगानगर, चूरू अर नागौर मांय कठे-कठे बिरखा व्ही। जयपुर मांय कठे-कठे दोपहरां मांय ई बिरखा व्ही। मौसम विभाग आज अजमेर, भरतपुर, कोटा, उदयपुर अर जयपुर संभाग मांय कठे-कठे बारिश रा आसार जताया है। केई जिलां सारू आज येलो अर ऑरेंज अलर्ट जारी करी ज्यो है।

000

जयपुर रा जवाहर कला केंद्र मांय 15वीं राज्य स्तर री डाक टिकट प्रदर्शनी 'राजपेक्स-2023 आज सरू व्ही। डाक विभाग रा राजस्थान परिमण्डल री ओर ऊं राखी ज्यी ई प्रदर्शनी मांय "जलमानुष" रा नाम ऊं पिछाण्या जावण वाळा ऊदबिलाव माथे, झालावाड़ जिला री "कोल्वी केव्स" अर "जवाहर कला केंद्र" माथे खास आवरण जारी करी ज्या। राजपेक्स-2023 मांय काल 'सिने नायक देवानंद' रा बारा मांय खास आवरण जारी कर्यो जावेला। प्रदर्शनी रे दौरान स्कूली विद्यार्थियां सारू डाक-टिकट चित्रण, क्विज, क्ले मॉडलिंग अर पेंटिंग, समेत भांत-भांत री होडां राखी जा रही है।

000

महात्मा गांधी अंतरराष्ट्रीय विश्वविद्यालय, वर्धा रा मानविकी अर समाजशास्त्र विभाग रा अधिष्ठाता प्रो. अनिल कुमार राय पंडित दीनदयाल उपाध्याय शेखावटी विश्वविद्यालय, सीकर रा कुलपति नियुक्त करी ज्या है। राजस्थान विश्वविद्यालय मांय अर्थशास्त्र विभाग री प्रो. अल्पना कटेजा ने राजस्थान विश्वविद्यालय री कुलपति बणायी ज्यी है। राज्यपाल कलराज मिश्र ई बाबत् हुकम जारी कर दीना है।

000

उत्तर पश्चिम रेलवे री ओर ऊं 16 सितम्बर ऊं 02 अक्टूबर ताई मणाया जा रह्या स्वच्छता पखवाड़ा रा तैत "स्वच्छ आहार दिवस" रे मौके अजमेर मंडल मांय साफ़-सफ़ाई रो खास अभियान राखी ज्यो। आज भारतीय खाद्य निगम रा क्षेत्रीय कार्यालय, जयपुर रा अहलकार अर कर्मचारी "स्वच्छता ही सेवा" अभियान रा तैत रैली निकाळ र सफ़ाई रो संदेश दीनो। आयकर विभाग रा अहलकार अर कर्मचारी ई प्लास्टिक काम नी लेवण री शपथ लीनी।

000